


中國古典文學基本叢書

中華書局



楊萬里集箋校

第四冊

中國古典文學基本叢書

楊萬里集箋校

第四冊

中華書局

楊萬里集箋校卷三二

按：本卷所載，起紹熙元年（一一九〇）庚戌十一月，迄紹熙二年辛亥秋，除江東運副赴任，居官建康諸作。

詩

江東集

和陸務觀用張季長吏部韵寄季長兼簡老夫補外之行〔一〕

今代老龜蒙，無書遺子公。也能將好句，特地寄西風。遲暮甘三已，飄雲笑兩窮。絕憐張與陸，百戰角新功。

別去公懷我，詩來我夢公。半輪笠澤月，一信鏡湖風。豈有詩名世，而無鬼作窮？
管城言曉事，猶欲策元功。

【箋證】

〔一〕題，補外，宋史本傳：「光宗即位，召爲秘書監。……紹熙元年，借煥章閣學士爲接伴金國賀

正旦使，兼實錄院檢討官。會孝宗日曆成，參知政事王藺以故事俾萬里序之，而宰臣屬之禮部郎官傅伯燾，萬里以失職力丐去，帝宣諭勉留。會進孝宗聖政，萬里當奉進，孝宗猶不悅，遂出爲江東轉運副使，權總領淮西江東軍馬錢糧。」張端義貴耳集卷下：「德壽丁亥降聖，遇丙午慶八十。壽皇講行慶禮，上尊號。周益公當國，差官撰冊文，讀冊書冊，擬楊誠齋、尤延之各撰一本，預先進呈。益公與誠齋鄉人，借此欲除誠齋一侍從爲潤筆。冊文壽皇披閱至再，即宣諭益公：「楊之文太聾牙，在御前讀時生受，不若用尤之文溫潤。」益公又思所以處誠齋，奏爲讀冊官。壽皇云：「楊江西人，聲音不清，不若移作奉冊。」壽皇過內，奏冊寶儀節及行禮官，讀至楊某，德壽作色曰：「楊某尚在這裏，如何不去？」壽皇奏云：「不曉聖意。」德壽曰：「楊某殿冊內比朕作晉元帝，甚道理？」楊即日除江東漕，誠齋由是薄憾益公。」按：高宗八十壽辰爲淳熙十三年事，貴耳集將此年事與誠齋本年出使江東混爲一談，甚誤，另據本書卷一三三「江東運副告詞，命下是爲紹熙元年十一月十三日。陸游所寄張續并及誠齋補外之作，劍南詩稿不存。

時陸游賦閑在山陰。

〔二〕「半輪」二句，笠澤，吳郡志卷一四：「三江者，在蘇州東南三十里，名三江口。一江西南上七十里至太湖，名曰松江，古笠澤江。」按：陸龜蒙居笠澤。鏡湖，嘉泰會稽志卷一〇：「鏡湖在縣東二里，故南湖也。一名長湖，又名大湖。」通典云：東溪，永和五年太守馬臻始築塘立湖，週三百十里，溉田九千餘頃，人獲其利。王逸少又云：山陰路上行，如在鏡中游。鏡湖之得名以此。」

之官江左，舟中梳頭

耐痒呼僮理亂絲，一梳一快勝千篔。是中妙處無人會，合眼垂頭到睡時。

題張以道上舍寒綠軒〔一〕

菊芽伏土糝青粟，杞筭傍根埋紫玉。雷聲一夜雨一朝，森然迸出如蕨苗。先生饑腸詩作梗，小摘珍芳汲冰井^①。風爐蟹眼候松聲，策籬親撈微帶生。爛炊凋胡浙青精，笔以天

隨寒綠萌。饑時作齋仍作羹，飽後龍鳳空庖烹。太官蒸羔壓花片，宰夫脷蹠削瓊軟。豹胎熬出禍胎來，貴人有眼何曾見？天隨尚自有愁魔，愁杞作棘菊作莎。君不見黃金錢照紅玉豆？秋高更覺風味多。先生釀金煉紅玉，自莎自棘如子何？金空玉盡苗復出，喫苗喫花并喫實。天隨白眼屠沽兒，不到有人頭上立。

【校】

①「冰」，汲古閣本、四庫本作「水」。

【箋證】

〔一〕張以道上舍寒綠軒，張以道，臨安人。誠齋集卷七五友善齋記：「太學之士有東吳張堯臣以道者，精於文，工於詩，其爲賢而靜，介而能穆，予初識之於友人張功父坐間，未知異也。一日，以道訪予，談學問，講詩文，雷出而水湧，且請予賦寒綠軒之詩。予怪而問之曰：『偕寒互綠，此天隨子杞菊賦語也，子也，方與四方九州之英俊戰得失於賢科之中，於寒綠焉取？』以道曰：『先生之所謂奚取，乃堯臣之所以深取也。』予始驚而異之，因爲賦之。」按：韓滉澗泉集卷六亦有寒綠軒張堯臣以道之居詩，詩云：「雪窗有第名寒綠，墜緒旁搜善能續。人間此味甘如飴，采擷行吟應自足。肯羨西湖多廈屋，只爲南湖先杞菊。春闈風閑折柳鏘，不信從前祇蘇陸。」知

張以道名堯臣無誤。項安世平庵梅稿卷六亦有謝張堯臣秀才惠詩，題下自注：「詩人張武子之弟，字以道。」諸書多作「堯巨」者，乃舊刻筆誤所致。上舍，宋史卷一五七選舉志三：「元豐二年頒學令，太學置八十齋，齋各五楹，容三十人。外舍生二千人，內舍生三百人，上舍生百人。……上舍分三等。……其國子生解額，以太學分數取之，毋過四十人。」張鑑南湖集中與張以道唱和之詩多達十五首，而平庵梅稿卷四有詩題爲：「三次劉寺韻，賦張以道新居，與約齋來湖相望。」詩中有自注云：「新居在行宮之側，後軍寨之右方。」

【附錄】

鄧深賦張以道寒綠軒（陸龜蒙杞菊賦）：

「惟杞惟菊，偕寒互綠。」：領略一軒寒綠，掃除萬種春

紅。飽取披煙沐雨，全勝抹月批風。

百世東坡居士，千秋甫里先生。近識南湖高隱，相望古今

同情。（大隱居士詩集卷下）

按：時人咏寒綠軒者甚多，僅錄其一，略窺其餘。

元白珽：舊讀天隨生、坡翁、南軒三君子杞菊賦，皆食菊之苗耳。屈子「夕餐秋菊之落英」，却是

食其花。近誠齋題寒綠軒詩：

「黃金錢照紅玉豆，秋高更覺風味多。」是食花也。余屋後有菊

二十餘本，亦嘗羹其苗矣。芳馨可愛，但小苦。至秋則花與枝葉大苦，不可食。按本草，菊有二

種，一種紫莖，氣香而味甘美，可作羹。一種青莖而大作蒿艾，氣味苦不堪食，名蕙花，非真菊。

如此則今所種概多蕙耳。

石湖有二云：

「吳下惟甘菊一種可食。品卑下，花細碎，其餘味皆苦。」

信矣。行當求所謂甘菊者，栽數十百株於寓所，以當蔬圃。今俗呼爲茶菊。（淇淵靜語卷一）

宿長安關〔一〕

野次何銷追水程？昏時卽往曉時行。驚眠幸自無更點，猶有船頭擊柝聲。

【箋證】

〔一〕長安關，讀史方輿紀要卷九〇浙江杭州府海寧縣：「長安鎮，縣西北二十五里。舊爲運道所經，宋熙寧元年提舉河渠胡准請修長安堰。紹聖中轉運使毛漸請起長安堰，至鹽官徹清水浦入海。淳熙二年漕臣趙礪老言，臨安府長安關至許村巡司一帶，漕河淺澀，請開浚。嘉定十二年，臣僚言，長安關上徹臨平，下接崇德。漕運往來，商旅絡繹，今海潮沖激兩岸田畝，恐有鹹水淹沒之患，而裏河堤岸亦將有潰裂之憂，乞敕有司及時修治。」

讀詩

船中活計只詩編，讀了唐詩讀半山。不是老夫朝不食，半山絕句當朝餐。

夜泊平望

夜來微雪曉還晴，平望維舟嫩月生。
道是燭花總無恨，爲誰須暗爲誰明？

一色河邊賣酒家，於中酒客一家多。
青帘不飲能樣醉，弄殺霜風舞殺他。

平望夜景

二簷簷，三當當，夜泊平望更點長，新月無光湖有光。
昨宵一雪今宵霜，犬吠兩岸歸人忙。
夜深人靜無一事，畫燭泣殘人欲睡。
忽有漁船外水來，一棹波聲風雨至。
半生墮在紅塵中，浮家東吳東復東。
樓船夜宿瑠璃國，誰言別有水晶宮？

遠樹

行行遠樹慘無聊，脫盡清陰只有梢。
霜幹瘦來無可庇，更能庇得鷺鷥巢？

望姑蘇

曠野平中天四垂，凍雲罅裏日平西^①。
水村人遠看來短^②，茅屋檐長反作低。
最愛河堤能底巧，截他山脚不勝齊。
喜聞借得姑蘇館，百尺高臺入杖藜。

【校】

①「罅」，汲古閣本、四庫本作「隙」。

②「短」，汲古閣本、四庫本作「近」。

風定過垂虹亭

松江未過不勝愁，過了垂虹百不憂。忽見石湖山上塔〔一〕，定知塔背是蘇州。

【箋證】

〔一〕石湖山上塔，周密澄懷錄卷下載范成大重九泛石湖記：「淳熙己亥重九與客自閶門泛舟，徑橫塘。……櫂擢石湖，扣紫荆，坐千巖觀下。……携壺度石梁，登姑蘇後後躋攀勇往。……山頂正平，有拗堂薛石可列坐，相傳爲吳故宮聞臺別館所在。其前湖光接松陵，獨見孤塔之尖。山尖之北，點墨一螺爲崑山。其後，西山競秀縈青叢碧，與洞庭、林屋相竇。」

鱸魚

兩年三度過垂虹，每過垂虹每雪中①。要與鱸魚償舊債，不應張翰獨秋風。買來一尾那嫌少？尚有杯羹慰老窮。祇是蓴絲無覓處，仰天大笑笑天公。

【校】

①「雪」，汲古閣本、四庫本作「過」。

泊姑蘇城外，大雪

夜燒銀燭卷金卮，猛落天花醉未知。若怯一寒都不看，却教六出更投誰^①？開門片片灑人面，送眼山山呈玉肌。纔雪又晴晴又雪，吳中風物許清奇？

今日雪光滿碧空，也無霧雨也無風。寂然窗戶黃昏後，霍地瓊瑤一望中。千里湖山銀作地，半篙舴艋玉爲宮。丁寧浮蟻非常綠，計會祥麟分外紅。

【校】

①「投誰」，汲古閣本、四庫本作「誰施」。

跋袁起巖所藏蘭亭帖(一)

南湖千載有斯人，拈出蘭亭花草青。俛仰之間已陳迹，至今此紙尚如新。

【箋證】

〔一〕題，袁說友東塘集卷一九有跋王順伯秘書所藏蘭亭修楔帖及跋汪季路太博定武本蘭亭修楔序二文，評說兩家收藏本之異同，後跋有云：「如順伯與今季路所藏，一見知爲至寶物也。蓋肥瘦別定武先後本，亦是要論。余留都下九年，士大夫所有幸數見之。……余雖隨羣嗜此，而所儲殊未確，僅有一二可以備遺，然必求有以顏頤於尤、沈、王、汪之門可也。」可見袁氏收藏蘭亭序蓋不止一本也。文中尤、沈謂尤袤、沈虞卿。

謁范參政，并赴袁起巖郡會。坐中熾炭，周圍遂中火毒，得疾垂死。乃悟貴人多病，皆養之太過耳。」

後炭前鑪便是窑，饒君似鐵也教銷。不須泉下火山獄，新制人間法外條。今日晴明殊可喜，病夫意緒自無聊。看來只欠刀圭藥，腳踏殘冰雪沒腰。

【箋證】

〔一〕題，范參政，益國文忠公集卷二二資政殿大學士贈銀青光祿大夫范公成大神道碑：「淳熙五年四月，以中大夫參知政事，又權兼修國史日曆。纔兩月，前御史亟論公，公即出門，明日宣押奏事，引咎而已。上曰：「朕不忘卿，數月訊至卿家矣。」除資政殿學士知婺州。公請以本官奉祠，詔如所乞，提舉臨安府洞霄宮。……淳熙十六年十一月起知福州，引疾固辭。……紹熙三年，加資政殿大學士知太平州。」據知本年范成大正居於吳郡家中。袁起巖，即袁說友，據東塘集書後所附家傳，袁說友「提舉淮東路常平茶鹽，提點浙西路刑獄，直秘閣知平江府，節制御前許浦水軍」。另據吳郡志卷一一郡守題名：「袁說友，朝議大夫直秘閣，紹熙元年三月到，二年

五月赴召。范成大、袁說友坐中皆熾炭事，明陳繼儒辟寒部卷二載范成大炭頌：「予病衰，大冬非附火不暖。既銘被爐，又作炭頌：燔木不灰，化爲精堅。是衷是陽，維火之傳。雪霾六虛，冰寒九淵。環堵之室，天不能寒。有赫神物，幹流化甄。尺璧寸珠，罔功汗顏。我維德之，莫之名言。既燠既安，與之窮年。」此可爲證，袁說友事未見。

辛亥元日送章德茂自建康移帥江陵〔二〕

極知借寇未多時，道是徵黃有近期。不割半青江令宅，却飛大白習家池〔一〕。湖山解語云來暮，淮水無情也去思。莫近鄉關動歸興，輕黃一點上雙眉。

西湖一別忽三年，白首相從豈偶然？到得我來恰君去，正當臘後與春前。醉餘犯雪追征帽，送了憑欄望去船。待把衣冠挂神武，看渠勛業上凌煙。

【箋證】

〔一〕題，辛亥，即紹熙二年（一一九一）。章德茂自建康移帥江陵，景定建康志卷一四建康表：

「淳熙十五年庚申，八月三十日朝散大夫敷文閣待制江東安撫使章森知府事。……紹熙二年辛亥，正月，森改知江陵府。二月，煥章閣直學士通議大夫江東安撫使余端禮知府事。」按：誠齋以中奉大夫直龍圖閣，於紹熙元年十二月二十六日到江南東路轉運副使任。見景定建康志卷二六江東轉運司題名。因之得以送章德茂移官江陵。

〔二〕不割二句，江令宅，輿地紀勝卷一七江南東路建康府：「江令宅，江總，陳人也。仕至尚書。金陵覽古云：在清溪，尤占勝地。劉禹錫有詩。」習家池，則在湖北襄陽縣，晉山簡多之池上嬉遊。

金陵官舍後圃散策〔二〕

江梅未落杏花繁，萱草都齊柳半勻。却是淺寒花較耐，東風未要十分溫。

旋種花窠二百枝，不知種了有花無？阿誰便向春工說，急擣紅藍染玉酥。

【箋證】

〔一〕金陵官舍，景定建康志卷二六：「轉運司在行宮西，紹興八年建。」至正金陵新志卷一二上：

「前宋轉運司，乾道志：紹興三年，以建康府治建行宮，改轉運司爲府治。轉運司移於子城之西，八年重建。大門南向，次中門，廳二，在大門內者爲南廳，在中門內者爲北廳。」

過秦淮〔一〕

曉過新橋啓轎窗，要看春水弄春光。東風作意驚詩眼，攪亂垂楊兩岸黃。

【箋證】

〔一〕秦淮，景定建康志卷一八：「秦淮，舊傳秦始皇時，望氣者言，五百年後，金陵有天子氣。於是東遊以厭當之。乃鑿方山，山斷長壘，爲瀆八於江，故曰秦淮。按實錄注：本名龍藏浦，其上有二源，一發自華山，經句容西南流，一發自東廬山，經溧水西流入江寧界。二源合自方山，西注大江。分派屈曲，不類人功，疑非秦皇所開。或曰方山西瀆，直屬土山三十里，是秦開。又鑿石碓山，西而疏決此浦，因名秦淮，蓋未詳也。」